

**VIJEĆE MINISTARA  
BOSNE I HERCEGOVINE**

Na osnovu člana 17. Zakona o Vijeću ministara Bosne i Hercegovine ("Službeni glasnik BiH", broj 30/03, 42/03, 81/06, 76/07, 81/07 i 94/07), Vijeće ministara BiH, na prijedlog Upravnog odbora Uprave za indirektno oporezivanje, na 30. sjednici održanoj 12. decembra 2007. godine, donijelo je

**ODLUKU**

**O POSTUPKU OSLOBAĐANJA I POVRATA AKCIZE I PUTARINE PO  
OSNOVU PRIMJENE MEĐUNARODNIH UGOVORA**

**GLAVA I. OSNOVNE ODREDBE**

Član 1.

**(Predmet)**

Ovom Odlukom propisuju se bliže odredbe o postupku ostvarivanja prava na oslobađanje i povrat akcize i putarine u okviru primjene međunarodnih ugovora koje je zaključila i/ili ratificirala Bosna i Hercegovina, a po osnovu uvoza i isporuke dobara:

- a) diplomatskim misijama, konzularnim predstavništvima, međunarodnim organizacijama i specijalnim misijama, članovima tih misija i njihovih porodica; i
- b) u okviru međunarodnih projekata pružanja pomoći u kojima je Bosna i Hercegovina obavezana međunarodnim ugovorom da obezbijedi da projekti ne budu opterećeni indirektnim porezima.

Član 2.

**(Definicije)**

U smislu ove Odluke sljedeći pojmovi znače:

- a) "međunarodni ugovor" - označava konvenciju ratificiranu ili preuzetu od Bosne i Hercegovine, međunarodni sporazum ili ugovor koji je Bosna i Hercegovina zaključila s drugim državama, uključujući i Opći okvirni sporazum za mir u Bosni i Hercegovini, u kojima se Bosna i Hercegovina obavezala na davanje povlastica po osnovu akcize i putarine, kao indirektnih poreza,
- b) "misija" - označava diplomatsku misiju u smislu Bečke konvencije o diplomatskim odnosima, Bečke konvencije o konzularnim odnosima, te specijalne misije u smislu Konvencije o specijalnim misijama,

- c) "članovi misije" - označava šefa misije i članove osoblja u smislu Bečke konvencije o diplomatskim odnosima i Bečke konvencije o konzularnim odnosima, te specijalne misije u smislu Konvencije o specijalnim misijama, kao i članovi njihovih porodica i drugo osoblje koje prema tim konvencijama mogu ostvarivati određene povlastice,
- d) "međunarodna organizacija" - označava organizaciju u smislu Općeg okvirnog sporazuma za mir u Bosni i Hercegovini, kao i organizaciju uspostavljenu u cilju provedbe međunarodnog ugovora.
- e) "indirektni porezi" - odnosi se na akcizu i putarinu koja se zaračunava na proizvode predviđene Zakonom o akcizama u Bosni i Hercegovini ("Službeni glasnik BiH", broj 62/04).

### Član 3.

#### **(Pravni osnov)**

Pravni osnov, iz kojeg proizilazi primjena međunarodnih ugovora, sadržan je u:

- a) Članu II tačka 7. Ustava Bosne i Hercegovine i članu 1. Općeg okvirnog sporazuma za mir u Bosni i Hercegovini,
- b) Bečkoj konvenciji o pravu međunarodnih ugovora iz 1969. godine,
- c) Bečkoj konvenciji o ugovornom pravu iz 1969. godine,
- d) Članu 28. Zakona o postupku zaključivanja i izvršavanja međunarodnih ugovora ("Službeni glasnik BiH", broj 29/00).

## GLAVA II. PRIMJENA MEĐUNARODNIH UGOVORA

### Član 4.

#### **(Obaveznost provedbe)**

- (1) Za provedbu ove Odluke zaduženo je Ministarstvo inostranih poslova BiH (u daljnjem tekstu: MIP) i Uprava za indirektno oporezivanje (u daljnjem tekstu: UIO).
- (2) U provedbi ove Odluke, MIP je dužan da blagovremeno obezbijedi sve akte iz svoje nadležnosti.
- (3) UIO, odnosno njene organizacione jedinice, poduzimajući radnje iz svoje nadležnosti, provodi postupak oslobađanja, odnosno povrata akcize i putarine, pridržavajući se odredbi međunarodnog ugovora shodno pravilu *pacta sunt servanda* tj. obaveze po kojoj svaki ugovor koji je na snazi veže stranke i one ga moraju izvršavati u

dobroj vjeri, te odredbi člana 7. stav (1) tačka m) Zakona o Upravi za indirektno oporezivanje ("Službeni glasnik BiH", broj 89/05).

#### Član 5.

##### **(Primjena ugovora)**

- (1) Međunarodni ugovor, vezano za akcizu i putarinu, provodi se direktnom primjenom odredaba tog ugovora.
- (2) Odstupanja od stava (1) ovog člana, dozvoljena su samo u slučaju primjene pravila reciprociteta.

#### GLAVA III. OSLOBAĐANJE OD PLAĆANJA AKCIZE I PUTARINE PRI UVOZU DOBARA

#### Član 6.

##### **(Oslobađanje od plaćanja akcize i putarine kod uvoza dobara za potrebe misije i članova misije)**

- (1) Pravo na oslobađanje od plaćanja akcize i putarine pri uvozu dobara može ostvariti misija, članovi misije, međunarodna organizacija i njeni članovi samo pod uvjetima predviđenim međunarodnim ugovorom koji je u pitanju.
- (2) Oslobađanje od plaćanja akcize i putarine pri uvozu dobara iz stava (1) ovog člana, ostvaruje se u carinskom postupku oslobađanja od plaćanja uvoznih dažbina za robu iz člana 28. Priloga Zakona o carinskoj politici Bosne i Hercegovine ("Službeni glasnik BiH", br. 57/04 i 51/06), a koji se provodi na način propisan Odlukom o postupku ostvarivanja prava na oslobađanje od plaćanja carine pod posebnim uvjetima ("Službeni glasnik BiH", broj 19/05).
- (3) Oslobađanje od plaćanja akcize i putarine iz stava (1) ovog člana, mogu biti ograničene samo kada je privilegija oslobađanja isključena po osnovu primjene pravila reciprociteta.

#### Član 7.

##### **(Oslobađanje od plaćanja akcize i putarine kod uvoza dobara u okviru međunarodnih projekata)**

- (1) Pravo na oslobađanje od plaćanja akcize i putarine pri uvozu dobara može ostvariti za uvoz dobara koji se vrši u okviru međunarodnih projekata pružanja pomoći za obnovu i rekonstrukciju, u kojima je Bosna i Hercegovina obavezana međunarodnim ugovorom da obezbijedi da projekti ne budu opterećeni indirektnim porezima.

(2) Oslobođanje od plaćanja akcize i putarine iz stava (1) ovog člana odobrava se samo na uvoz derivata nafte i to: dizel gorivo, motorni benzin-bezokolovni, motorni benzin iz člana 9. Zakona o akcizama u Bosni i Hercegovini ("Službeni glasnik BiH", broj 62/04).

(3) Oslobođanje od plaćanja akcize i putarine pri uvozu dobara iz stava (1) ovog člana, ostvaruje se u carinskom postupku oslobođanja od plaćanja uvoznih dažbina za robu iz člana 176. stav 2. i stav 3. Zakona o carinskoj politici Bosne i Hercegovine ("Službeni glasnik BiH", br. 57/04 i 51/06), a koji se provodi na način propisan Odlukom o postupku ostvarivanja prava na oslobođanje od plaćanja uvoznih dažbina za robu koja se stavlja u slobodan promet za projekte obnove i rekonstrukcije ("Službeni glasnik BiH", broj 19/05) i Odlukom o postupku ostvarivanja prava na oslobođanje od plaćanja uvoznih dažbina za robu koja se stavlja u slobodan promet za vojne i policijske snage i kazнено-popravne ustanove i za deminiranje ("Službeni glasnik BiH", broj 19/05).

#### GLAVA IV. OSLOBAĐANJE OD PLAĆANJA AKCIZE I PUTARINE PRI NABAVCI AKCIZNIH PROIZVODA U BOSNI I HERCEGOVINI

##### Član 8.

##### **(Oslobođanje od plaćanja akcize i putarine za misiju i međunarodne organizacije i njihove članove)**

(1) Pravo na oslobođanje od plaćanja akcize i putarine na dobra koja nabavlja u Bosni i Hercegovini za službene i lične potrebe, može ostvariti misija i međunarodna organizacija uspostavljena u Bosni i Hercegovini i njihovi članovi, pod uvjetima reciprociteta.

(2) Članovi misije mogu ostvariti pravo na oslobođanje od plaćanja akcize i putarine samo na nabavku dizel goriva, motornog benzina-bezokolovni, motornog benzina, osim ako drugačije nije regulirano međunarodnim ugovorom, a što potvrđuje MIP.

(3) Oslobođanje od plaćanja akcize i putarine iz stava (1) ovog člana može se koristiti samo prilikom kupovine akciznih proizvoda kod proizvođača ili kod registriranih PDV obveznika navedenih u prilogu ove Odluke.

(4) Proizvođač koji vrši isporuku dobara koji su osnovom stava (1) ovog člana oslobođeni od plaćanja akcize i putarine nije dužan izvršiti plaćanje akcize i putarine, s tim što je obavezan na fakturi navesti da akciza i putarina nisu plaćene, serijski broj i datum službenog naloga, te takvu fakturu priložiti uz izvještaj koji podnosi UIO o obračunu i plaćanju akcize.

##### Član 9.

##### **(Dokazi o oslobođanju od plaćanja akcize i putarine za misiju i međunarodne organizacije i njihove članove)**

(1) Oslobađanje od plaćanja akcize i putarine iz člana 8. ove Odluke, misija i međunarodna organizacija može ostaviti na osnovu fotokopije potvrde o reciprocitetu, odnosno dokumenta kojim se potvrđuje da je oslobađanje od akcize i putarine predviđeno međunarodnim ugovorom, izdatim od strane ministarstva nadležnog za inostrane poslove i original službenog naloga za nabavku akciznih proizvoda bez plaćenje akcize i putarine za službene potrebe kojeg izdaje ovlašteno lice misije ili međunarodne organizacije.

(2) Oslobađanje od plaćanja akcize i putarine iz člana 8. ove Odluke, članovi misije i članovi međunarodne organizacije mogu ostvariti na osnovu fotokopije potvrde o reciprocitetu, odnosno dokumenta kojim se potvrđuje da je oslobađanje od akcize i putarine predviđeno međunarodnim ugovorom, izdatim od strane ministarstva nadležnog za inostrane poslove i original službenog naloga za nabavku akciznih proizvoda bez plaćanja akcize i putarine za lične potrebe kojeg izdaje ovlašteno lice misije ili međunarodne organizacije.

#### Član 10.

##### **(Službeni nalog za nabavku akciznih proizvoda)**

(1) Službeni nalog iz člana 9. stav 1. ove Odluke izdaje se na obrascu SNA (službeni nalog za nabavku dobara bez plaćanja akcize i putarine), čiji je izgled i sadržaj dat u prilogu ove Odluke.

(2) Službeni nalog iz člana 9. stav 2. ove Odluke izdaje se na obrascu LNA (službeni nalog za nabavku dobara bez plaćanja akcize i putarine), čiji je izgled i sadržaj dat u prilogu ove Odluke.

(3) Službeni nalog iz stava 1. i 2. ovog člana izdaje se u tri primjerka od kojih se dva daju prodavcu, a treći zadržava korisnik oslobađanja za svoje potrebe.

(4) Misija i međunarodna organizacija dužna je, prije izdavanja prvog službenog naloga iz člana 9. ove Odluke UIO dostaviti podatke o licima ovlaštenim za izdavanje službenih naloga s deponovanim potpisima tih lica, kao i da dostavi obavještenje o promjenama lica kojima je dato ovo ovlaštenje u roku od 8 dana od dana nastanka promjene.

#### GLAVA V. POVRAT AKCIZE I PUTARINE PLAĆENE ZA AKCIZNE PROIZVODE ISPORUČENE U BiH MISIJI I MEĐUNARODNOJ ORGANIZACIJI I NJIHOVIM ČLANOVIMA

#### Član 11.

##### **(Ostvarivanje prava na povrat akcize)**

Pravo na povrat akcize i putarine plaćene za akcizne proizvode isporučene u Bosni i Hercegovini, misiji i međunarodnoj organizaciji i njihovim članovima uz oslobađanje od plaćanja, može ostvariti registrirani PDV obveznik iz člana 8. stav 3. ove Odluke.

## Član 12.

### **(Podnošenje zahtjeva za povrat akcize i putarine)**

Zahtjev za povrat akcize i putarine lice iz člana 11. ove Odluke, podnosi se jednom u mjesecu za sve isporuke dobara u toku tog mjeseca, nadležnoj organizacionoj jedinici koju odredi UIO.

## Član 13.

### **(Zahtjev za povrat)**

- (1) Zahtjev za povrat akcize i putarine se podnosi na obrascu "CD-A1M", čiji je izgled i sadržaj dat u prilogu ove Odluke.
- (2) Uz zahtjev se prilaže:
  - a) faktura na kojoj je naznačeno da akciza i putarina nije obračunata i naplaćena,
  - b) fotokopiju potvrdu o reciprocitetu, odnosno dokumenta kojim se potvrđuje da je oslobađanje od akcize i putarine predviđeno međunarodnim ugovorom,
  - c) original službenog naloga za nabavku akciznih proizvoda bez plaćanja akcize i putarine iz člana 10. ove Odluke,
  - d) dokaz o plaćenju akcizi i putarini za koji se traži povrat.

## Član 14.

### **(Faktura)**

- (1) Faktura po osnovu koje se traži povrat plaćene akcize i putarine, pored propisanih elemenata mora da sadrži i naziv kupca, odnosno misije ili člana misije ili međunarodne organizacije, iznos akcize i putarine koji je predmet oslobađanja, te serijski broj službenog naloga i broj potvrde o reciprocitetu iz člana 9. ove Odluke.
- (2) Faktura mora biti dostavljena u originalu i ista ne može biti starija od 3 (tri) mjeseca.

## Član 15.

### **(Dokaz o plaćanju)**

Kao dokaz o plaćanju akcize i putarine smatra se dokaz o plaćanju preko poslovnog računa (deviznog ili KM računa), kao i drugi dokumentirani dokaz o plaćanju.

## GLAVA VI. POVRAT AKCIZE I PUTARINE U OKVIRU MEĐUNARODNIH PROJEKATA

### Član 16.

#### **(Ostvarivanje prava na povrat akcize i putarine u okviru međunarodnih projekata)**

- (1) Pravo na povrat akcize i putarine plaćene na dobra nabavljena u Bosni i Hercegovini može ostvariti investitor - u okviru međunarodnog projekta pružanja pomoći kojima je Bosna i Hercegovina obavezana međunarodnim ugovorom da obezbijedi da projekti ne budu opterećeni indirektnim porezima.
- (2) Povrat plaćene akcize i putarine odobrava se samo na nabavke derivata nafte i to: dizel gorivo, motorni benzin-bezokolovni, motorni benzin.

### Član 17.

#### **(Podnošenje zahtjeva za povrat)**

- (1) Zahtjev za povrat akcize i putarine lice iz člana 16. ove Odluke, podnosi se jednom u mjesecu za sve isporuke dobara u toku tog mjeseca, nadležnoj organizacionoj jedinici koju odredi UIO.
- (2) Za fakture nominalne vrijednosti preko 10.000 KM zahtjev se može podnijeti prije isteka roka iz stava (1) ovog člana.

### Član 18.

#### **(Uvjeti za ostvarivanje prava na povrat)**

- (1) Zahtjev za povrat akcize i putarine se podnosi mjesečno na obrascu "CD-A 2M", čiji je izgled i sadržaj dat u prilogu ove Odluke.

(2) Uz zahtjev, investitor je obavezan priložiti sljedeće:

- a) fakturu na kojoj je iskazan iznos akcize i putarine za koji se traži povrat (original ili kopija ovjerena od strane izdavaoca), koja ne može biti starija od 3 mjeseca;
- b) dokaz o plaćanju akcize i putarine za koji se traži povrat;
- c) kopija ugovora na osnovu kojeg se traži povrat, koja se prilaže samo uz prvi zahtjev za povrat u okviru jednog međunarodnog ugovora.

Član 19.

**(Dokaz o plaćanju akcize i putarine)**

Za dokaz o plaćanju akcize i putarine smatra se dokaz o plaćanju preko poslovnog računa (deviznog ili KM računa) kao i drugi dokumentirani dokaz o plaćanju.

GLAVA VII. POSTUPAK I EVIDENCIJA

Član 20.

**(Evidencija i izvještavanje)**

(1) UIO vodi evidenciju o korisnicima prava na oslobađanje i povrat akcize i putarine, iznosu akcize i putarine za koji je izvršeno oslobađanje od plaćanja, iznosu akcize i putarine za koji je odobren povrat po osnovu ove Odluke.

(2) UIO na kraju kalendarske godine dostavlja podatke iz stava (1) ovog člana i izvještava Vijeću ministara shodno odredbi člana 27. stav (2) Zakona o postupku zaključivanja i izvršavanja međunarodnih ugovora ("Službeni glasnik BiH", broj 29/00), o provedbi ove Odluke.

GLAVA VIII. ZAVRŠNE ODREDBE

Član 21.

**(Objava)**



Ova Odluka objavljuje se u "Službenom glasniku BiH".

Član 22.

**(Stupanje na snagu)**

Ova Odluka stupa na snagu osmog dana od dana objavljivanja u "Službenom glasniku BiH".

---

VM broj 199/07  
12. decembra 2007. godine  
Sarajevo

---

Predsjedavajući  
Vijeća ministara BiH  
dr. **Nikola Špirić**, s.r.